

Prome Minister Mike Eman: Gobierno ta compronde preocupacion di trahadonan di Valero

Gobierno ta bay reduci belasting riba e pakete di retiro pa trahadonan di Valero

ORANJESTAD — Despues cu trahadonan di Valero a manifesta dilanti Bestuurskantoor, Gobierno a duna nan oido y a reuni cu nan. Prome Minister Mike Eman a repasa e manifiesto cu e trahadonan a entrega. Den e manifiesto tabata tin varios punto di preocupacion cu a hala atencion di e prome mandatario.

Ta trata di 94 trahado di Valero cu ta sinti cu e pakete di retiro di Valero no ta beneficia nan. E reunion a tuma luga na edificio di IMSAN, hunto cu Minister di Labor Otmar Oduber, abogado Figaroa y Faruup cu a representa e trahadonan.

NEGOSACION

Durante e reunion a trata e diferente puntonan di preocupacion pa e trahadonan. E trahadonan a mostra cu pa cierto grupo loke Valero ta ofrece na nan alparecer no ta duna e satisfaccion y e seguridad cu mester. Tambe nan a splica henter e proceso con a trata cu e negociacion nan y e proceso. E trahadonan a pidi gobierno pa di un forma of otro tene cuenta cu necesidad di e trahadonan.

REAPERTURA

Gobierno a mostra e trahadonan cu ta trahando riba un posibel reapertura di e refineria. Tambe ta trahando riba e posibilidad pa uza e habilidad nan y experiencia di e trahadonan den e refineria, den otro sector na Aruba. Gobierno ta kere cu ta bay logra hopi cupo di trabou, pero ta bay keda hende cu dificilmente por haya un trabou, debi na nan experticio. Economia di Aruba cu ta bay sigui crece y ta bay ofrece hopi trabou, pero no den e mesun ramo cu esunnan di Valero tin experiencia den dje. Enseñansa pa empleo ta bay yuda e personanan aki pa haya un trabou den otro luga.

INCENTIVO FISCAL

Durante e reunion a bin dilanti, e peticion riba reduccion di impuesto pa e pakete di retiro cu e trahadonan a haya. Actualmente e ley ta bisa cu mester paga 25 porshento di belasting. Gobierno a dicidi caba cu ta bay reduci e porcentahe aki na 15. E trahadonan a puntra gobierno pa wak si por crea diferente

categoría. Ciertu grupo ta haya 3, 5 of 15 porshento di reduccion.

Minister Mike de Meza a bisa cu e ta bay tuma e parti aki na consideracion, pero e tin su complicacion, comokiera cu e ley aki no ta conta solamente pa Valero, pero pa tur sector

aki na Aruba.

FUTURO

E reunion a bay den bon ambiente y e trahadonan tabata hopi sensato y hopi informativo. Gobierno ta compronde e preocupacion di e trahadonan di Valero y tur

otro trahado nan cu ta den e situacion aki.

Gobierno a priminti e trahadonan di Valero cu nan ta bay keda den contacto cu e trahadonan y ta keda pendiente den futuro di tur informacion di tur dos banda riba e proceso aki. □



**Prome Minister
Mike Eman**